



Le petit rabrtàud

I va vous aléngàe ine istoere d'oseas

Oi ét in riquét de rabrtàud tot gadaes, le vole a çha rame, le se jhouc prtot, l'at la pllume qui trluse et qu'èt bèn lisse, l'èll effrillai, l'at boune rimajhe ét boun alén ; bréft, l'èt en plléne santai quàe!

Prtant li, l'arét bèn vaughu être grous coume ine tourte, in pijhun ou core ine ajhace ou bèn ine grole.

Le s'avise que le vat forcir, le se boute a l'ésport, le va en sale faere de la gunflète pi le trute in petit a çhés anfétamines.

Pr groussir, le meù ol ét core de ménjhàe, ménjhàe é maeme se baufràe

O fàut dire qu'avouere ol ét pas bèn malaesai de trere de la ménjherie.

O l'at daus boetes a nihhàe prtout entour lés mésuns avec daus gràenes pi dau pén durallou en deden, Core mae, l'ivar, quant o fét grous de fréd o y at daus dounàes d'aeve téde deùs fés den la jhornàie.

Pi o l'at étou daus boules de graesse accruchàies den lés abres.

Quent i étai draule, o l'avét pas tot ça mé o l'avét daus boessuns, béréde de boessuns bourus, lés oseas se motiant o qu'ol étét le mae foullajhous, le çhu virai drét aux vents fréds, le troviant deque menjhàe, daus bàies, daus énsécs, daus vars pi daus gréns den lés cours aus jhelines.

O fasàe mae de fréd qu'aneùt mé o l'avét bèn mae d'oseas.

A fine force d'aripàe lés palisses l'avant casiment avirai lés oseas;

O bèn ! sur qu'o revéndra, l'avant quemençai a en repllantàe, dasar que le peyis dét dounàe çheùques sous pr çheù.

Pr en retornàe a noutre ga, le rabrtàud,, l'at bèn boçai, avour le se pmène a piotes ac daus triques pr pas cheùre, o li ser d'abourdes (l'èt tant grous que le peu pu volàe).

In jhor, le croese ine grole qui li dit :

Bedame qui que tu ét tàe ? Te semble in rabrtàud mé t'as le corsajhe d'in marle ; tu dé être ine EGM dasar. (enjhençe jhénétiqement modifae)

O nun, (qu'o li répoune le rabrtàud) ol ét màe qu'at vaughu retiràe a vesàutres, lés grous oseas.

A bé t'as pas malement abenai (répoune la grole).

I araete. (qu'o dit le rabrtàud) Ac totes çhés saloperies que i ae engoulai, asteùre i seu brimai, i ae le colestérol, la diabète pi le çheùr qui cougne ; i bufe coume in bufour de forghe.

Oi ét vrae que t'as la pllume graessouse é pas bén serai pi t'as l'ell trnajhe (qu'o dit la grole).

Oi ét bén vrae, i ve pu rén, oi ét pas bén grave, i vole casiment pu mé

i pe pa aver daus lunétes ; pr nesàutres lés oseas, le bun dioù at pas bén fé sun ouvrajhe, le nous at pas fé d'oralles pr lés téndre

T'as résun, sognes té bén (qu'odit la grole) é fé atenciun aus chaçours, si le t'agrichant, é çheu oi ét pas bén malaesai, l'alant te boutàe in aste den le dare pi t'acruçhàe den la cheminaie pr te gralàe. O se passe de maeme ché nous amis landaes pr lés ortolans (o se dit étout daus binetuts).

(Lés landaes, asteùre ac çhéle novéle réjhiun oi ét daus amis, avant l'etiant lén, oi étét daus étranjhàes).

Le fasant dépeùs bén luntèp daus ortolans a l'aste pr lés segnours, pi avoure, pr les grous messieus au boursicot épàes ; é maeme aus prlégants! I é vu dire que tonton l'aimàe bén çheu.

L'agrichant les oseas ac daus péjhes ou bén de la glue su daus pllanches; oi ét défendu, tot le monde o savant mé o se fét trjhou.

Tu ves, vaque a tae ; argarde, nesàutres, lés groles, qui valant pas la cartouche pr nous ebrsàe, le nous tirant dessu quant maeme pr faere la fameuse potàie a la grole

Savéz- vous coument qu'o se fé çhelle potàie ? Nun ! E bén i va vous o dire (espréciun qu'o desét noutre encéin prlégant Colas)

Quant que t'as les groles (oi en fau bén tràes) te lés échàudes pr lés pllumàe pi te lés écoutounes te lés farsis ac dau lard pi daus pires de volature ; tu lés nouques

Quant a sunt pràetes, te lés pouses den le pot a tràes potes, tu fés abrhjàe ac de l'aeve frède, pi tu boutes in ougnun picai de clous de jhirouffle, in nouai pi atou in marteau a debout ac le manche en-su

T'acruches le pot a la cramallère de la cheminaie pi t'atens qu'o jhargote. O fàut quemencàe a fréd pr que lés groles séjhiant pu tendres

Den çchau tenp tu pllumes traes grousses carotes, traes pomes terre, daus naveas, in chou rabe ou bén ine rabiote pi tu z'ou cope a cha morcea ; t'adoues étout deùs pais de poràie çheùques felles de

chou pome pi traes boces d'all.

Quant qu'o boulle o faut atèner ine boune eùre pr boutàe lés pothages. Tu cuntès core deùs eùres pi à çha moument tu sors le marteau pr vere o qu'o n'ét ; quant le marteau ét çheùt, les groles i sunt atou.

Boun afiall